

1 Jon

Mo ti betere bete mole fo

1 ¹ Mo take keké naale alimótei kaae sóró bitiré wale whi, diappaee hakearólo i dere ape. Ai whiné ama dere fo dané mo wosóo, kelenékélé mo kolóo, dané wisiyólo fopeyólo naasenékélé olaa yóo, yalepó. Dané i dere fota, ai mo ti betere fo bole whi Yesu diá kóló kóló yaosóro hakearólo dapó. ² Ai kale mo ti betere bete áta, Alimatamo betólo dá beterepaee hakearólo sókó wapa, dané mo kelalepó. Atéro hakearale wapa dané kelale mo ti betere bete á i ape yólo, dané mió diappaee yó i matere ape. ³ Diakélél dátamo betá kisipa mutu dere ala fea touyólo yaai dané kelale alaró wosale fotamo yó i matere ape. Até du betere alata, ti dāšisi maaté bitu ini, Alimaró Naalema Yesu Kerisotamokélél dá fea touyólo, betá kisipa mutu dere ala du beterao. ⁴ Dané i asē dereteita, haí dere ala dá tuámó mo ti faayópólo du beterao.

Talené ama ere de tuámótóro betae

⁵ Ama dāpaee yó male fo diappaee hakearólo i dapa wosae. Kótó áta mo deótóro faanuraalu, á tuámó diliki ere ala mo sawakélél munipó. ⁶ Dá diliki tuámó bitutei, haí foné maaté dáta Kótótamo mo betá kisipa mutu, dere alarape du beterao depata, ti kale mo fo bete dané hosaa tuámó muniruraalu kapala fo du beterao. ⁷ Tépaitei, Yesu á Talené de tuámó biture kaae, dákelé ai de tuámó betepa, ti ne notamo mo betá kisipatóro mutu, dere ala fea du beterao. Atétepa, ama Naalema Yesu Kerisoné fakené dané dowi ala fea fokólo aluró beterao.

⁸ Dané duraalutamo dá tuámó dowi ala me munipó depata, ti kale mo fo dá tuámó muniruraalu dátei ai dilikitu betere ape. ⁹ Dané yale dowi alatamo kemerae yólo Kótópaee hakeamó yó matepa, ti ama eraalopó ere fo hašókó feni, ama mo donoi ala sya furaalu, dané du betere dowi ala tokólo aluraalopó. Téturaalu, dá fea dowi alatamo hosekéro betaosóro, ama fokólo mo ti aluraté fu betaalopó. ¹⁰ Dané duraalutamo, dáta dowi ala mekélé munire so whi beterao depata, ti Kótó á kapala fo bole seké aoratao. Atétere alané Kótóné ama mo fo dá tuámó sóro mulalénipó.

2 ¹Yalo hosaa mo turó mole naale senaale-ó, diꞑ me dowi ala yaꞑsóró kisipa mutu, asꞑ i dere ape. Téꞑatei, whꞑ me detamo dowi ala depata, ti ai dowi alané dꞑ só deraꞑsóró, mo donoi ala du betere whꞑ Yesu Kerisoné, tao sere fo ama Alima Kótópaae du beteraꞑó. ²Dꞑné du betere dowi alamó Kótó ꞑ fopaae butu, melaai yale kwia dꞑpaae melaꞑsóró sesé duraalu, Yesuné ama tikimó seróló ꞑ sukꞑlepó. Atére alata, dꞑné du betere dowi ala maaté sóró aluraai initei, i hae kwiamó betó mole so whꞑné dowi alakélé tokóló kemeraai yaleꞑó.

³Dꞑné ama ere fo wosóló sya fu betepa, ti Yesu Keriso ꞑ mo diriyóló kisiparapóló tuꞑ mutapó. ⁴Whꞑ me dené duraalu, yaꞑo ꞑ mo wisiyóló kisiparapó du bitutei, Kótóné ere fo wisiyóló sya feni depata, ti kapala fo du betereiteiné kale mo bete mole fo ai whꞑ tuꞑmó munipó. ⁵Téꞑatei, me whꞑ dené Kótóné ama fo sya fóló eró tapata, ti atétere whꞑ tuꞑmó Kótóné ama yaala sókó fole ala faꞑyóló mo sꞑró beteraꞑó. ⁶Dꞑ ꞑ tuꞑmó betere ala etéró kꞑae kolóló kisipa enéraꞑó. Whꞑ me dené duraalu, ꞑta Kótó tuꞑmó beteraꞑó depata, ti ai whꞑné ama dere alakélé Yesuné yale ala kaaetóró enéraꞑó.

⁷Yalo hosaa mole no nerape-ó, yaꞑo diꞑpaae yae yóló i asꞑtere fota, kisi fo kae dumipó. Mo take kaae sale alimótei, Kótóné yae yóló muló betepa diaaꞑ woseté wale fotórótípó. Ti ai yóló muló betere fota, take dꞑné diꞑpaae yó matepa, diaaꞑ woseté waleꞑó. ⁸Téꞑatei, Kótóné yae yóló muló betere kisi fo yaꞑo diꞑpaae i asꞑ dere ape. Ti ai yae yóló dere foné du ꞑ tuꞑmó muóo, diꞑ tuꞑmókélé muóo epa so whꞑrapené kilitu, aita mo alapó enéraꞑó. Ti noatepae, doasi dꞑ sókó wóló dꞑró betereiteiné diliki kemeraté fu beteraꞑó.

⁹Whꞑ me dené ꞑta dꞑ tuꞑmó beteraꞑó du bitutei, ama Keriso no ne hóróló bóe du betepata, ti ai whꞑ ꞑ diliki tuꞑmó haꞑe ai betere ape. ¹⁰Whꞑ me dené ama ne nopaae yaala sókó fole ala mupa, ti ai whꞑ ꞑ dꞑ tuꞑmó betereiteiné me alané ꞑ dée nalatere ala mo enénipó. ¹¹Téretei, whꞑ me de ama no ne hamoma hóróló bóe du betepa, ti ai whꞑ ꞑ diliki tuꞑmó bitu ꞑ kotere alakélé, diliki tuꞑmótóró kutu beteraꞑó. Atéreteiné ꞑ kotere tiki ama kelené kelenénipó.

¹²Yalo hosaa mole naale senaale-ó, diaaꞑ yale dowi ala fea Yesuné ama yale alané haꞑe sóró kemeró beteraꞑóló diꞑpaae asꞑ i dere ape.

¹³Ayarape-ó, mo take keké nale alimó haꞑe betó tare seké diaaꞑ kisiparapóló yaꞑo diꞑpaae asꞑ i dere ape.

Diꞑ teó whꞑrape-ó, dowi Satan-tamo bóe dóló Talené fotokóné diaaꞑ ꞑ tꞑteró betepa, yaꞑo diꞑpaae i asꞑ dere ape.

Yalo hosaa mole naale senaale-ó, Aya diꞑné kisipareiteiné yaꞑo diꞑpaae i asꞑ dere ape. ¹⁴Ayarape-ó, mo take kaae sale alimó haꞑe betere seké diꞑné kisipareiteiné yaꞑo diꞑpaae asꞑ i dere ape.

Teó wh̄irape-ó, diã doasi fotokõ buóo, diã tuãmó Kótóné fo muóo, diãné dowi Satan doló t̄eteróo, ereteiné yãlo diãpaae aš̄ dapó.

Haemó mole ɔla ó alapaee hosaa muóló yaala sókó fu betaq̄se ere fo

¹⁵I haemó mole ɔla ɔlapaae ó dere alarapepaae h̄kesetu hosaa mo turó mutu betaq̄se. Wh̄i me detamo ai ala du betepa, ti atétere wh̄i tuãmó Aya Kótóné yaala sókó fole ala munipó. ¹⁶Ti noatepae, i haemó mole alarape i ape. Wh̄irapené ek̄leyóló du betere dowi alakélé, kelené kolóló au nokole alakélé, mepaae du betere alaró ɔla ɔlatamo mole doasi néli wh̄ipóló bopé faketu betere alakélé, fea Aya betere m̄ kaayóló wómiti, i haemó kaaróló du beterepó. ¹⁷I haeró haemó muó mole ɔlakó senée yóló ek̄le dere alatamota keme yaalotei, Kótóné ama kisipa mole ala sya fóló erótu betere so wh̄ita sukókélé ini, mo ti h̄le betó tawaalopó.

Kerisotamo b́e dóló kapala fo yó matere wh̄i waalopóló ere fo

¹⁸Yãlo hosaa mole naale senaale-ó, mió d̄a mo kemetere sukamó beterepóló k̄ae kolóló kisipa yaaitere ala i ape. Kale Kerisotamo b́e dele wh̄irape wou beterepó dere fo diaaɔ wosalepó. Ti ai wh̄irapeta, mió wóló i betere ape. Atétere ala kilituraalu, kale kemetere suka felekemó walapóló kisipa muaalopó. ¹⁹Ai wh̄irape atima take d̄atamo betalet̄ei, d̄a taaróló fele beteta, d̄a fake meiru yalepó. Motamo d̄a fakétóró uãsóró, ti d̄atamo fea betãmó betó mulapó. Té uãtei, atima d̄a taaróló fele betené atima mo bet̄a wh̄ikókélé d̄akó meipóló h̄kearalepó.

²⁰Tépat̄ei diãta, dowi ala mo bet̄akélé munire wh̄i Yesu Kerisoné ama so wh̄ipóló D̄ei Kepené d̄ale muló betereiteiné kale mo foné bete diã feané ai kisipare ape. ²¹Yãlo diãpaae i dere aš̄ta, kale mo foné bete diã kisipanipóló dumipó. Tépat̄ei, ai fo diaaɔ mo turó kisipa yóo, ai fo tuãmó kapala fo mo sawakélé buni yóo, eretei diaaɔ kisipa epa dapó. ²²Doasi kapala fo du betere wh̄i de? Yesuta, Kótóné so wh̄i t̄eteróló kaae tare wh̄i meipóló b́e du betere wh̄ipó. Atétere wh̄ita, Alima Kótóró Naalema Yesu Kerisotamo bitinipóló faletu betere wh̄i ai ape. ²³Wh̄i me dené Naalema bitinipóló sisópaae eratapata, ti Alimakélé bitinipóló sisópaae eratapó. Mepaae wh̄i denétamo Naalema mo beterepóló kisipa tiratepa, ti atétere wh̄iné Alimakélé mo beterepóló kisipa tiratapó.

²⁴Térapa, mo take kaae sale alimótei, diaaɔ woseté wale fo diã tuãmó muó tanópóló yae. Ai fo diã tuãmó muó tapa, ti diã Naalemaró Alimatamo tuãmó betó tawaalo ai ape. ²⁵Ai ala tuãmó betepa, ama d̄apaae mo eraalopóló ere fo i ape. Sukutere alakélé ini, mo ti betó tawaalopó erapó.

²⁶Yãlo i dere aš̄ta, diã dée nalaairaalu, kópaae ālisóro fu betere wh̄irapené du betere ala diaaɔ kisipa yópóló i dere ape. ²⁷Diã tuãmóta, D̄ei Kepe Wisi taketi betero betereiteiné, diã yó melaaire wh̄i me kae

yaʒanipó. Ti noatepae, kale Deji Kepe Wisiné fea ala bete diʒapae yó mótu betepapó. Ai Deji Kepe Wisiné diʒ tuʒmó ai eró betere ɖaleta kapala mei, mo ti eró betepapa, ama diʒapae yó matere fo sya furaalu, Yesu Keriso tuʒmó betó tawae.

Kótóné naale senaalepó ere fo

²⁸Térapa, yaʒo hosaa mole naale senaale-ó, Yesu Keriso fesaae wale sukamó ɖa hale dere ala ini, halaainé betepa kolópolópa, diʒ Yesu Keriso tuʒmó betere ala haʒe yó tawae.

²⁹Diaaʒ kisipané Yesu Keriso ʒta, donoi ala du betere whi wisinaale betepapó kisipa mutupa, ti mepaae so whiné du betere wisi ala kilituraalu, ita Kótóné naale senaale betepapóló kisipa muae.

3 ¹ɖaʒa, Kótóné ama naale senaale ereteiné, Aya Kótóné ɖapaae mo doasi yaala sókó fale ala muluraalu erapa kelere! Ai fo ereteiné ɖa mo ama naale senaaletóro i betere ape. I haemó betó mole so whiné Kótó tuʒnireteiné atima ɖakélé tuʒnipó. ²Yaʒo hosaa mole no nerape-ó, ɖaʒa Kótóné mo ama naale senaaletóro betepapó. Take nalopaae ɖa noa kaae so whi betaaloró mió ɖa kisipanipó. Tépatei, ʒ sókó wale sukamó mió ere ala kaaetóro yóló wapa ɖané kelaaireteiné, ɖakélé ʒ kaaetóro alée fóló betaalopóló kisipa mutapó. ³Take nalopaae atei ala mo yaalopóló, Yesupaae kisipa tiki tiratere so whi feata, Yesu ʒ me dowi alatamo hoseké inire whi wisi biture kaae, atimakélé dowi alatamo hoseké inire so whi betaairaalu, atimanétei taletu betepapó.

⁴Mepaae so whi de dowi ala du betepa, ti yaʒse yóló Kótóné tukóló muló betere fo tikitu betepapó. Ti dowi alanéta, Kótóné tukóló muló betere fo munire aʒratapó. ⁵So whiné du betere dowi ala tokóló aluraai Yesu Keriso waleteti diaaʒ ai kisipare ape. Ti ʒta, dowi ala mo sawakélé munire whipó. ⁶So whi de Yesu Keriso tuʒmó betepa, ti atére so whi dowi ala du betaalo meipó. Mepaae so whi de dowi ala haʒe deté fu betepa, ti ai so whiné ʒ kolókélé ini yóo, kisipakélé ini yóo, erapó.

⁷Yaʒo hosaa mole naale senaale-ó, mepaae whiʒapené diʒ dilikóló kópaae ʒlisó faʒsóró yae. Mepaae whi de mo donoi ala du betepa, ti Yesu Keriso ʒ mo donoi whi biture kaae, ai whikélé atéro betepapó. ⁸Whi me detamo dowi ala du betepa, ti Satan ʒ tuʒmó bitu yae depa du betepapó. Ti noatepae, take kaae sale alimótei Satan ʒ dowi ala bete tale bitu, so whi dowi ala yópóló sesemeraté wou betalepó. Kótóné Naalema wale beteta, Satan-né ai du betere ala doraai walepó. ⁹Mepaae so whi de Kótóné ama ala tuʒmó deyóló betero betepa, ti ai so whi dowi ala deté faalo meipó. Ti Kótóné wisi ala kaaratere ke ʒ tuʒmó boleteiné me dowi yó tanénipó. Ti noatepae, Kótóné atima deyóló betero betereiteinépó.

¹⁰Ita Kótóné naale senaale ó Satan-né naale senaalepóló kʒae kolóló tuʒ yaaitere ala i ape. Mepaae so whi donoi ala initepa ó no nepaae yaala sókó fole ala initepa, ti atétere so whi Kótóné naale senaale bitinipó.

Ne notamo yaala sókó fu betae ere fo

¹¹ Diaaꝓ mo take kaae sale alimótei, kaae sóró woseté wale fo i ape. Ðané ne no hamomatamo yaala sókó fole ala du betenérápó. ¹² Kale whi Kein a dowi kepené yae dere ala sya furaalu, ama noma dóló sukunótu yale kaae, diaaꝓkélé atei kaae ala yaꝓse. Ti noa betené Kein-né ama noma dóló sukunaleé? Ama yale ala do yóo, nomané yale alamo dono yóo, yale betené nomatei dalepó. ¹³ Yaꝓo no nerape-ó, i haemó betó mole so whiné diꝓ hóróló bóe dele ala depa, ai noa ala du dérópóló, diꝓ kilita sókó faꝓse. ¹⁴ Ðata, ne no hamomapaꝓe yaala sókó fole ala du betereteiné sukutere ala tuꝓmó betaleteti taaróló, mo ti betere ala tuꝓpaꝓe fóló beterapóló kisipa muaalopó. Whi me de yaala sókó fole ala initepa, ti atétere whi sinitere ala tuꝓmó haꝓe beterapó. ¹⁵ Whi me dené ama no ne hóróló bóe dupa, ti atétere whi a whi dele whiꝓó. Whi dele whiꝓape tuꝓmóta, mo ti betere bete muniretei diaaꝓ ai kisipare ape.

¹⁶ Yaala sókó fole alané bete ðané kisipa yaaire ala i ape. Yesu Kerisoné ða tao suraalu, ama betere bete haꝓe melóló sukꝓlepó. Até du yale kaae, ðanékelé ðané betere bete ne no tao suraalu haꝓe melóló sukunérápó. ¹⁷ Whi me de fea ɔla sꝓmó muluraalutei, ama no kꝓletu mepaꝓe yaꝓaꝓe ɔla taosóro meni depa, ti atétere whi tuꝓmó Kótóné yaala sókó fole ala nétéró muaaloé? ¹⁸ Yaꝓo hosaa mole naale senaale-ó, ðané haꝓe tó kꝓlóné ó foné maaté yaala sókó fole ala ini, hosaa tuꝓmó mo alatóro muluraalu, me whi tao sóró eratere ala yaalopa sae. ¹⁹⁻²⁰ Ðané tamó ai ala du betepa, ti ða mo fo tuꝓmó beterapóló kisipa yaalopó. Ða haꝓsókó fole alané hosaa tuꝓmó sekené mo ti só deraꝓsóro, ne nopaae yaala sókó fole ala depa Talené keletómó hosaa muni deyóló dua betere ala enérápó. Ti noatepaꝓe, Kótóné fea ala ama tuꝓe iruraalu, ðané hosaa tuꝓmó mole sekei alarape fea ama teꝓeró beterapó.

²¹ Yaꝓo hosaa mole no nerape-ó, ðané hosaa tuꝓmó mutere kisipané ða só derénitepa, ti Kótóné keletómó halaainé diriyóló daanérapó. ²² Ðané ama yóló muló betere fo wosóló sya fóo, ama kisipa mole alakélé eróo, du betereteiné ðané mepaꝓe yaꝓaꝓere ɔla aꝓaae wosetepa, ti ama mo melaalopó. ²³ Ama yae yóló muló betere fota i ape. Kótóné ama Naalema Yesu Kerisopaꝓe kisipa tiki tiró bitu, ðané ne nopaae yaala sókó fu betepa, ti aita ama ðaꝓaae yae yóló muló betere ala ai sya fole ape. ²⁴ Mepaꝓe whi de Kótóné ama yae yóló muló betere fo sya fu betepa, ti atétere whiꝓape Kótó tuꝓmó betóo, Kótó aꝓkélé atima tuꝓmó betóo, erapó. Tale ða tuꝓmó beterapóló tuꝓe dere alata, ama ða tuꝓmó beterale Ðei Kepe Wisiné yó matepa, ðané a kisipanérápó.

Kótóné dotꝓale Keperó kae keperapetamo kꝓae kolóló tuꝓe yaaitere ala

4 ¹ Yaꝓo hosaa mole no nerape-ó, kae kae keperape fea so whi tuꝓmó ai betó mulapa, ai keperapené dere fo wosóló mo dapóló kisipa tiki

tiraqse. Aténi, ai keperapeta Kótóné dotonatepa walepé whi me kaené dotonatepa walerópóló mo wisiyóló k̄ae kolóló tale yae. Ti noatepae, Kótóné fo eratere k̄óló wh̄ipóló dilikitere wh̄irape i hae kwiamó mo dekéro wóló ai betó mole ape. ²Kótóné dotonale Kepe méro k̄ae kolóló kisipa yaai dere alata, i ape. Mepaae wh̄irapené duraalu, Yesu Keriso ̄ata, Kótótei mo wh̄iné tiki daayóló walepó dere keperapeta, ti Kótóné dotonale Kepe ai ape. ³Atépatei, Yesu Kerisota Kótótei mo wh̄iné tiki daayóló wénipó dere keperapeta, ti Kótóné dotonale keperape meipó. Aita, Yesu Kerisotamo bóe dóló so wh̄i dilikitere wh̄iné keperape waalopó depa take dīané woseté waleteti, mió i haepaae mo wóló ai betere ape.

⁴Ȳalo hosaa mole naale senaale-ó, dīata Kótóné ama deyóló betero betere naale senaaletóro ai betere ape. Atéru, dī tūamó betere Kepené bóe dóló ama bole fotok̄oné ai kapala fo du betere wh̄irape tūamó betere keperape t̄eteró beterapó. ⁵Ti ai wh̄irape atimata, i haemó kaayóló betereiteiné atima kisipakélé i haemó mole kisipatóro mulapó. Atérené, haemó betó mole so wh̄inékéle atima dere fotóro wosóló sya fu beterapó. ⁶Dāta, Kótó tūamó kaayóló betereiteiné, mepaae Kótó kisipare so wh̄iné ti dané dere fo mopóló wosetu beterapó. Tépatei, Kótó tūamó bitinire wh̄irapenéta, ti dané dere fokélé mopóló wosetimipó. Ti ita mo fo dere Kepe Wisiró kapala fo dere kepetamo taleyóló kisipa yaai dere ala ai ape.

**Kótóné d̄apaae yaala sókó fu dere kaae, danékélé
mepaae so wh̄ipaae yaala sókó fae**

⁷Ȳalo hosaa mole no nerape-ó, dané ne notamo mo yaala sókó fole ala du betaalopa sae. Ti noatepae, yaala sókó fole alata, Kótó tūamó kaayóló walapó. Ne nopaae yaala sókó fu betere so wh̄i feata, ti Kótóné deóló betero betere naale senaale bitu, Kótó mo diriyóló kisiparapó. ⁸Mepaae wh̄i de tūamó yaala sókó fole ala munipa, ti atétere wh̄iné Kótó mo tūenipó. Ti noatepae, Kótó ̄ata yaala sókó fole ala bete ereiteiné. ⁹Kótóné d̄apaae yaala sókó fóló mole ala hākearóturaalu, ere ala i ape. Dā ̄ tūamó betero póló, ama mo bet̄a betere Naale i haepaae w̄póló dot̄eyalepó. ¹⁰Kótóné ama yaala sókó fole alané bete i ape. Folosóro dané Kótó ̄apaae yaala sókó fole ala inipó. Ténitei, amapi d̄apaae yaala sókó furaalu, dané dowi ala kwia tokóló aluraai, ama Naalemané betere bete hāle melóló sukópóló, dotonalepó. ¹¹Ȳalo hosaa mole no nerape-ó, Kótóné amapi kaayóló d̄apaae yaala sókó fole ala hāle yó tareiteiné, danékélé ne notamo mo yaala sókó fole ala depa ti mo wisirapó. ¹²Mo bet̄a wh̄iné Kótó kolókélé inipó. Ténitei, dané ne nopaae yaala sókó fole alatamo du betepa, ti Kótó dā tūamó bitu, ama yaala sókó fole alakélé dā tūamó mo s̄uró beterapó.

¹³Ti ama Kepe Wisi dā tūamó betereiteiné, Kótó ̄ dā tūamó betóo, dā ̄ tūamó betóo, erapóló dané kisiparapó. ¹⁴Alima Kótóné ama Naalema

i hae kwiamó betó mole so wh̄i aluyaqsóró, tao sere wh̄i beteṛópóló dotonale ala ḍané mo kelalepóló, ḥakearóló so wh̄ipaae i du betere ape. ¹⁵Mepaae so wh̄i denétamo Yesu Kerisota Kótóné naalemapóló diriyóló kisiparu, mepaae so wh̄ipaae ḥakeamó yó matepa, ti ai so wh̄i Kótó tuḡmó betóó, Kótókélé ai so wh̄i tuḡmó betóó erapó. ¹⁶Atéru Kótóné ḍapaae yaala sókó fole ala ḍané tuḡreteiné, ḡpaae hosaa muóló tiró beteṛapó.

Ti Kótó ḡta yaala sókó fole alané bete Tale beteṛapó. Wh̄i me de yaala sókó fole ala tuḡmó betepa, ti atétere wh̄i Kótó tuḡmó betóó, Kótó ḡkélé ai wh̄i tuḡmó betóó, erapó. ¹⁷Ḍa Kótó tuḡmó atéṛó betepa, yaala sókó fole ala ḍa tuḡmó mo turó ḡayaalopó. Atéṛó bitu, take kemetere alimó fo tokóló taletepa ḍa wikélé ini, mo halaainé daayaalopó. Ti noatepae, Yesu Keriso ḡ ama Alimané kisipa mole ala erótu betale kaae, ḍḡkélé i haemó ḥale bitu, Yesuné ama kisipa mole ala erótu beteṛeteiné ḍa ḡ kaaetóro beteṛapó. ¹⁸Yaala sókó fole ala du betere so wh̄i tuḡmó witere ala mo sawakélé bunipó. Tépatéi, witere wh̄iṭa ama du betere alamó dowi kwia saalopóló kisipa mutu ḍapó. Ti atéṛó witere so wh̄i tuḡmó Kótóné yaala sókó fole ala ḡani teórapó. Ai ala epatei, Kótóné yaala sókó fole ala ḡaturaalu, witere ala alurótu beteṛapó.

¹⁹Folosóro Kótóné amapi ḍapaae yaala sókó faleteiné ḍané ḡpaaekélé, ne nopaekélé yaala sókó fu beteṛapó. ²⁰Wh̄i mené duraalu, ḡ Kótópaae yaala sókó fu beteṛapó du bitutei, ama no ne ḥóróló bóe du betepa, ti ḡ kapala fo dere wh̄i ai ape. Ti noatepae, wh̄i me dené ama kilitu betere no nepaae yaala sókó fole ala initepa, ti kelepaa kilinire Kótópaae yaala sókó fole ala mo enénipó. ²¹Ti Kótóné ḍapaae yae yóló muló betere fo i ape. Kótópaae yaala sókó fu betere so wh̄inéta, no nepaaekélé yaala sókó fu betenérápó.

Yesu Keriso Kótóné Naalemapóló kisipa tirae ere fo

5 ¹Yesuta, Kótóné so wh̄i ṭeṭeróló kaae tare wh̄i Kerisopóló kisipa tiki tiratepa, ti atétere so wh̄iṭa, Kótóné deyóló beteṛó beteṛapó. Mepaae so wh̄i Alimapaee yaala sókó fole ala du betepa, ti atétere so wh̄iné ama naale senaalepaaekélé yaala sókó fu beteṛapó. ²Ḍané Kótó ḡpaae yaala sókó furaalu, ama yóló muló betere fo sya fu betepata, ti Kótóné ama naale senaalepaae yaala sókó fu beteṛapóló ḍané kisipa enérápó. ³Kótóné ama yóló muló betere fo sya fóló ai fo aḡmó mo dua betere alata, ti Kótópaae yaala sókó fole alané bete ai ape. Ai fo sya foleteita, mo hapólunipó. ⁴Ti noatepae, Kótóné deyóló beteṛó betere naale senaalené i haemó mole alatamo bóe dóló ṭeṭeró beteṛapó. Ti aita, Yesu Keriso mo beteṛapóló ḍané kisipa tiki tiró beteṛeteiné i haemó mole ala fea mo ti dóló ṭeṭeró ai betere ape. ⁵Noa ala ere so wh̄iné i haemó mole alatamo bóe dóló ṭeṭeró betere? Yesu Keriso ḡta, Kótóné Naalemapóló kisipa tiki tiróló betere so wh̄iné maaté ai ala ṭeṭeró beteṛapó.

⁶Yesu ʔta Kótóné Naalemapóló haʔkearaterere alata, weʔiró sameatamo tuʔmó walepó. ʔta, mo weʔi tuʔmó maaté wéni, samearó weʔitamo tuʔmó walepó. Kale Dɛi Kepe Wisi ʔ mo foné bete betereteiné, amakélé Yesu ʔta, Kótóné Naalemapóló yó mótu beterapó. ⁷Até yale alata, sore ɔlarapené etéro haʔkearóló yó matapó. ⁸Kale Dɛi Kepenékélé, weʔinékélé, sameanékélé, i sore ɔlarape atima feané mo betʔ fotóro dua dapó. ⁹Mo whʔné etei kaae ala depa kelalepóló dere fo ɔané wosóló mo dapóló kisipa tirótua dapó. Tépatéi, Kótóné ama Naalené ere alamó kisipa mutu, haʔkearóló ere foné mo whʔné dere fo tɛteróló teraae falapó. Ti noatepae, Kótóné ʔta, mo foné betereteiné. ¹⁰Kótóné Naalemapae kisipa tiki tiró betere so whʔné hosaa tuʔmó, Kótóné ama haʔkearóló dere fo mopóló kisipa mutapó. Tépatéi, mepaae whʔné Kótóné dere fo wosóló tuɛ tiki tirénitepa, ti atétere so whʔné Kótó ʔ kapala fo bole seké aɔrapó. Ti noatepae, Kótóné ʔta ama Naalepó, dere fo wosóló tuɛ tiki tirénitereiné. ¹¹So whʔi feané wosóló kisipa tiki tirópoló, Kótóné haʔkeamó ere ala i ape. Kótóné ama mo ti betere bete ɔ meló beterapó. Ai ti betere beteta, ama Naalema tuʔmó mulapó. ¹²Kótóné Naalema Yesu Kerisotamo betʔmó titiyóló betere so whʔta, mo ti betere bete sóro tarapó. Ama Naalematamo titiyóló betenire so whʔta, mo ti betere bete sóro tanipó.

Yesu Kerisoné ala tuʔmó betae yóló mo kemerótu dere fo

¹³Yʔlo i dere aɛta, Kótóné Naalema Yesu Kerisoné doimó bitu, ʔpaae kisipa tiki tiró betere so whʔpaae mo ti betere bete ɔané sóro tarapóló kisipa yaasepóló i dere ape. ¹⁴Dʔ witere ala ini, Kótó betere felekepaae fóló halaainé wosaai dere ala i ape. ɔané tamamo ama kisipa mole ala eraai me ɔlakó kematepa, ti ama mo wosetua dapó. ¹⁵ɔané wosetere ala ama mo matapóló kisipa tiratepa, ti ʔpaae noa ɔlakó wostepa ama melaalopó.

¹⁶Me whʔné ama no netamo sukóló mo ti alu enénire dowi ala du betere keletepa, ti Kótóné ama betere bete melópoló Talepaae moma eranérapó. Yʔlo i dere fota, alu enénire dowi ala dere so whʔmó kisipa mutu dapó. Tépatéi, mo ti sukutere tikipaae falaaire dowi alata, ti ama kae mulapó. Ai aluyaaire tikipaae faaire dowi ala dere so whʔmó momarae yóló dumipó. ¹⁷Kótóné yóló muló betere fo tikitere alata, ti ai dowi ala ai ape. Tépatéi, mepaae dowi alané so whʔi sukutere tikipaae ʔlisó fumipó.

¹⁸Kótóné deyóló betero betere so whʔta, dowi ala haʔle deté fumipóló ɔané kisiparapó. Ti ai so whʔi me ala yaɔsóro, Kótóné ama deyóló betero betere Naalené mo wisiyóló kaae tareteiné, dowi kepené ʔ doranénipó. ¹⁹Dʔta, Kótóné ama naale senaaletóro beteretei ɔané kisiparapó. Tépatéi i haemó betó mole so whʔiró yó mole ɔla ɔlatamo dowi kepené tɛteróló kaae tare aɔmó mulapó. ²⁰Kótóné Naalema Yesu Keriso i haepaae

waletei, dā so whi feané ʔ tuámó mole ala bete kisipa yóo, dāné Kótó ʔkélé mo alané betepóló kisipa yóo, yópóló waletei dāné tuęrapó. Dāta, mo alané bete tale Naalema Yesu Keriso tuámó beterapó. ʔta me kae mei, Kótótóró bitu, mo ti betere bete talepó.

²¹Yālo hosaa mole naale senaale-ó, diā Kótó taaróló, i haemó kae kae betó mole kapala kótópaae faqsóró, mo wisiyóló kae tawae.